

BEHAR

LIST OSNOVNE ŠKOLE POLJICE

BROJ 1



JASMIN AGANOVIĆ, VIII a

RIJEČ UREDNIKA

Dragi naši učenici, roditelji i nastavnici evo došli smo do prvog broja vašeg i našeg đačkog lista "BEHAR". Prijatna mi je dužnost da se ovom prilikom zahvalim svima onima koji su pomogli u izradi ovog lista.

Ovaj projekat pored svoje informativne funkcije ima višestruki odgojno-obrazovni i kulturni značaj. Prije svega udovoljava slobodom ispoljavanja dječije ličnosti i njezinom potvrđivanju u određenoj oblasti stvaralaštva.

Također utiče na zadovoljavanje osnovne socijalne potrebe, a to je težnja za javnom afirmacijom, koja je veoma snažan pokretač i motiv u procesu učenja i rada. Istraživanja pokazuju znatno preimuštvo isticanja učeničkog uspjeha putem javnih skupova i sredstava masovne komunikacije nad novčanim nagradama i poklonima, što bi naročito trebali znati svi oni koji rade sa djecom i omladinom. Ono što ne bismo smjeli zaboraviti, je da djeca u svom odgojnom napredovanju stalno budu podsticana, i da javno prikazivanje rezultata rada bude podešeno onda kada će obezbijediti uspjeh, i izazvati doživljaj vlastite afirmacije. To je put da se rad doživljava kao ljepota i smisao ljudske egzistencije.



U današnjim uslovima opšte krize u vaspitno-obrazovnom radu, škola mora biti svjesna svoje neprocjenjive uloge. Ta uloga je ujedno i obavezuje da teži ka javnom prikazivanju rezultata, jer je to prije svega u interesu dječije težnje za afirmacijom kao i škole da dokaže svoju vrijednost.

Prvi broj "BEHARA" vam nudi razne zanimljivosti školskog života, saznanja, učenička i nastavnička postignuća. Učenička aktivnost i samostalnost u izradi ovog lista, kao i sloboda u izboru sadržaja i njihovo kreiranje su elementi od posebnog savremenog i refomskog značaja.

Ljubazno Vas pozdravlja
pedagog škole, Admir Osmanović
Poljice, 01.11.2004.g.

SADRŽAJ

○ NAŠA ŠKOLA	3
○ POSTIGNUĆA	4,5
○ UZORNI I USPJEŠNI UČENICI	6,7
○ VAŠI RADOVI	8,9
○ TALENTI	10
○ VRIJEDNI POŠTOVANJA	11
○ AKTUELNOSTI	12
○ ŽIVOT ROMA	13
○ ISTRAŽIVANJA	14
○ STRANICA RAZONODE I ZANIMLJIVOSTI	15




TRI RADA PREDLOŽENA ZA NASLOVNICU: IMŠIROVIĆ AMRA (VIša), MALKIĆ MIRZA (VIša), IMŠIROVIĆ ALMEDINA (VIša)

BEHAR

List odobren od strane Ministarstva obrazovanja, nauke, kulture i sporta Tuzlanskog kantona, na osnovu Godišnjeg programa rada škole i Instrumentarija za vrednotvanje osnovnih škola, od juna mjeseca 2004 god. IZDAVAČ: JUOŠ "POLJICE" u Poljicu, tel/faks: 540-698 ZA IZDAVAČA: Ferid Nukić, direktor. GL. I ODG. UREDNIK: Admir Osmanović, pedagog REDAKCIJA: Fahrudin Beganović, nastavnik raz. nastave; Enisa Imamović, nastavnik bosanskog jezika; Erna Nuhić, nastavnik bosanskog jezika; Amira Nukić, nastavnik TO i informatike; članovi novinarske i foto sekcije. Prvi broj lista "BEHAR" je besplatan, štampan kao dio Projekta za poboljšanje kvalitete odgojno obrazovnog rada Federalnog Ministarstva obrazovanja i nauke, PCU-Obrazovanje, pod nazivom "Knjiga vrata budućnosti". ŠTAMPA: NIK "GRAFIT" Lukavac, tel/fax: 035 553-521

NAŠA ŠKOLA

Naša škola je sagrađena 1936. godine, imala je dvije učionice, zbornicu, dvije pomoćne prostorije i učiteljski stan sa tri sobe. Prvi učitelj je bio Osmanović Mehmedalija, a kasnije je postavljen kao upravnik. U to vrijeme školovala su se samo muška djeca. Škola se tada zvala "Državna dječja pučka škola Poljice." U našoj školi vremenom je radilo više od 200 nastavnika, a izdvojićemo neke koji i danas rade, kao što su: Aganović Ljubica, Rahmanović Edhem, Hasanović Fuad i Kasumović Hasan. Naša škola je doživjela mnogo uspjeha od kojih možemo izdvojiti uspjeh sa Evropskog takmičenja saobraćajne sekcije 1999. godine u Hrvatskoj učenika Nukić Almina. Takođe je i Nukić Maida osvojila drugo mjesto u Cazinu 11.06.2000. godine i plasirala se na Evropsko takmičenje održano u Njemačkoj u gradu Hanoveru u septembru 2000. godine. I odbojkaška sekcija ostvarila je velike uspjehe kada je na kantonalnom takmičenju 2001. godine osvojila 1. mjesto. U ovoj 2004-toj god. uvodi se devetogodišnje školovanje. U tom odjeljenju nalazi se 22 učenika. U našoj školi predmetnu nastavu pohađa 528 učenika. Od ukupno 20 odjeljenja, devet odjeljenja su predmetne nastave, osam odjeljenja razredne nastave, te dva kombinovana odjeljenja razredne nastave u područnoj školi i jedno odjeljenje prvoga razreda devetogodišnjeg obrazovanja. Po mišljenju našeg direktora Nukić Ferida koji dvadeset pet godina radi naporno i marljivo za ovu školu, trebamo kao učenici da se zainteresujemo za čitanje knjiga, te da se održi takmičenje na osnovu toga koji je učenik pročitao najviše knjiga, da se proglasi pobjednik na kraju godine. Treba pokrenuti inicijativu da bolji učenici, a ne samo loši odu kod pedagoga ili direktora ako im je potrebna pomoć. Na kraju, jedna poruka od našeg direktora Nukić Ferida: "Čuvajte imovinu naše škole, jer vam je ona potrebna, poradite na vašem ponašanju prema zaposlenicima ove škole. Trudite se da što bolje sačuvate našu školu i da date svoj doprinos uspjehu ove škole."



NEKADAŠNJA ŠKOLSKA ZGRADA U POLJICU, SAGRAĐENA 1938.



NOVINARKE BRKIĆ AMINA (VIIIb) I FAJIĆ AZRA (VIIIb) U RAZGOVORU SA DIREKTOROM NUKIĆ FERIDOM

U SUSRET RAMAZANU

Odabran među svi mjesecima, mjesec posta RAMAZAN zauzima posebno mjesto kod vjernika islamske vjeroispovjesti. Uzvišeni Allah dž. š. je post propisao druge godine po Hidžri u mjesecu Šabanu. "Post je ostavljanje hrane i pića i izbjegavanje svega što Allah dž. š. ne voli (ogovaranje, psovke, vrijeđanja...).

On ne samo da pročišćava tijelo nego to čini sa njegovom dušom.

Približava bogatog siromašnom putem SADEKATU-L-FITRA poklanjanja hrane dovoljno za jedan ili više dana. Čovjek u postu spoznaje mnoge Allahove blagodati. Kada dođe ramazan vrata Dženneta se otvore, vrata Džehennema se zatvore, a šejtani bivaju okovani. Postaču je jedan dan posta pred Allahom vredniji nego hiljadu drugih dana. Ti dani se provode u ibadetu (molitvama), nagrada za post je štit od džehenemske vatre. Postač ima dvije radosti: IFTAR vrijeme kada postač prekida post i uživa u Allahovim blagodatima i BAJRAM-dan kada se post završava i veliča Allahovu moć, a to neće i nemože osjetiti nepostač.

Mjesec ramazan je VELIKA PRILIKA KOJU NE SMIJEMO PROPUSTITI.

O PRIJATELJSTVU REKLI SU:

EMERSON

- Jedini način da imaš prijatelja jeste da budeš prijatelj.

MARK TWAIN

- Potrebni su ti prijatelji i neprijatelji da bi te ranili u srce; jedni da te klevetaju, a drugi da ti to jave.

RUSKA IZREKA

- Prijateljstvo je kao staklo jednom kad ga razbiješ više ga nećeš sastaviti.

ENGLESKA IZREKA

- Budi spor kad biraš prijatelje, a još sporiji kad ih mijenjaš.

A. CESARES

- Čovjeka koji me razumije, nikada ne mogu izgubiti.

OVIDIJE

- Sklapaj prijateljstvo samo sa sebi ravnima.

PASKAL

- Kad bi svi ljudi znali šta jedni o drugima govore, na svijetu ne bi bilo ni četvorice prijatelja.


POSTIGNUĆA

MATEMATIČARI

Moramo se pohvaliti da naša škola ima mnogo izvrsnih matematičara. Mnogi su pokušali vježbati naprednu matematiku, ali su ubrzo odustali, a uporni su nastavili dalji rad.

Nekima je matematika noćna mora, a nekima igra.

Prošle godine na općinskom natjecanju okušale su se: Aganović Azra, Osmanović Salma i Karić Selma. Naše matematičare pripremao je nastavnik Brkić Omer. Nadamo se da ćemo ove godine postići bolje rezultate.



RECITACIJA

Mnogi misle da je recitovati vrlo dosadno, a neki da je to jedna vrsta zabave. Prošle godine na takmičenju našu školu iz recitacije predstavljao je Karic Mirza sa pjesmom o Zejni kojom je postigao zapažajuće rezultate. Ovu sekciju uspješno vodi nastavnica Imamović Enisa. Početkom ove školske godine recitatorska sekcija broji malo više članova u odnosu na predhodnu godinu. Nadamo se da ćemo sa njima ostvariti dobre rezultate a također se nadamo da nas Mirza neće napustiti.



GLUMCI

Film i gluma su uvijek bili izazovi za učenike. Kako bi se iskazali u ovoj oblasti u našoj školi redovno se odvijaju časovi dramske sekcije. Nastavnica bosanskog jezika Nuhić Erna je zadužena za vodjstvo sekcije, ali i za sve njihove uspjehe i neuspjehe. Nastavnica uspješno osmisli i dramatizuje tekst iz raznih oblasti i uskladi sa načinom izvođenja svih djela dramske sekcije. Svojim učešćem na školskim priredbama oni nas i nasmiju i rasplaču. Osim na području škole učenici dramske sekcije učestvovali su i na takmičenjima. Školu su predstavili i na Festivalu kulture i umjetnosti u Lukavcu. Dramska sekcija broji 10 članova: Nukić Muamer, Suljić Aldiana, Imširović Emir, Kasumović Mubera, Vuković Ahmed, Ejubović Admira, Aganović Jasmin, Imširović Sabina, Kasumović Vedad i Imširović Almedin.



CIVITAS

Prošle godine u sudjelovanju na Opštinskom takmičenju učenici sekcije "CIVITAS" na temu: "MI ZASLUŽUJEMO BOLJI ODGOJ I OBRAZOVANJE" osvojili su 3 mjesto. Sekciju je predvodila profesorica Tokić Lejla. Naravno sekcija ne bi postojala da nije nadarenih učenika: Bjelić Džane, Nukić Irnele, Brkić Medihe, Beganović Melike, Fajić Almira, Osmanović Salme, Karić Selme i Žabić Aide.

ODBOJKA

Odbojkaška sekcija, sa nastavnikom Fuadom Hasanovićem na čelu, ima dugu tradiciju i velike rezultate. Ističemo dobar uspjeh muške i ženske reprezentacije, koje su na Opštinskom takmičenju osvojile 3. mjesto.

KOŠARKA

Članovi košarkaške sekcije su i dječaci i djevojčice. Naše košarkašice u Opštinskoj ligi u svih 14 utakmica ostale su neporažene i zaslužno osvojile 1. mjesto, a 5. mjesto na Kantonalnom takmičenju. Košarkašku sekciju vodi nastavnik razredne nastave Beganović Fahrudin.

ATLETIKA

Atletičari ove škole učestvovali su na Jesenjem krosu koji se održao na jezeru Ontario-Bistarac i postigli su za naš uslove solidne rezultate. Na Opštinskom prvenstvu OŠ u atletici postigli smo sledeće rezultate: Ž. štafeta: 4x100m: 2. mjesto; M. bacanje kugle: 2 mjesto; M. Ž. trčanje 800 m: 3. mjesto; Ž. skok u dalj: 2. mjesto.

RITMIKA

Da ima talentovanih za ples i ritmiku pokazuje postojanje ritmičke sekcije u našoj školi, koja je na prošlogodišnjem Kulturno-umjetničkom stvaralaštvu u Lukavcu osvojila prvo mjesto.



SAOBRAĆAJCI

U saobraćajno-obrazovnim takmičenjima na području Opštine, škola nekoliko godina osvaja 1 mjesto i uzima učešće na Kantonalnom takmičenju. Osnovna škola Poljice je dobila priznanje u povjerenju BIHAMK-a za najuspješniju školu u BiH za 2001. godinu.

Ističemo i odličan rezultat ove sekcije na Državnom nivou, a to je osvojeno 1. mjesto, za koje su najviše "krivi" učenici Almin Nukić, Maida Nukić i naravno njihov nastavnik Hasan Kasumović.



**USPJEŠAN
NASTAVNIK**

Za najuspješnijeg nastavnika naše škole, ovom prilikom odabrali smo, ne baš slučajno, nastavnika TO-a Hasana Kasumovića, koji od svega, moglo bi se reći, najviše poštuje i cijeni ljudski rad i red.

Za takve tvrdnje, ne treba puno dokaza, dovoljno je prebrojati i vidjeti sve te diplome i pehare koje je sa svojim učenicima osvojio na raznim takmičenjima od Opštinskog do Evropskog nivoa. Na razgovor o svojim uspjesima je pristao samo zato što smo mi njegovi učenici, jer kako nam reče, nerado priča o sebi i svojim uspjesima. Što pokazuje da je

nastavnik Hasan, vrlo skroman čovjek, kakvih je danas nažalost vrlo malo. U razgovoru sa nastavnikom doznajemo da je njegov najveći uspjeh bio kada su njegovi učenici Almin Nukić i Maida Nukić osvojili 1 mjesto u saobraćaju na državnom takmičenju i time stekli pravo učešća na Evropskom takmičenju u Njemačkoj. Pored ovog superodličnog rezultata, nastavnik se proslavio i mnogobrojnim Opštinskim, Kantonalnim i Federalnim takmičenjima a da bismo sve pojedinačne plasmane spominjali, trebalo bi nam ovom prilikom dosta prostora i vremena.

Mi kao urednice školskog časopisa, imale smo zadatak da završimo u svaki od viših razreda i nađemo "one najbolje", što smo i uradile. Obavile smo intervju i saznale nešto više o uzornim učenicima. Dakle, mi ćemo vam dokazati da su to svestrani učenici, a ne štreberi kako to većina vas misli...

ONI NISU



Žabić Melisa



Malkić Adil



Osmić Mensur



Ejubović Jasna

ŽABIĆ MELISA VIII-A

Melisa je rođena 12.05.1990. godine. Kaže da provodi mnogo vremena u učenju, inače ne bi postigla odličan uspjeh. Omiljeni predmet joj je engleski, jer mnogo voli strane jezike. Zbog previše školskih obaveza nije uključena ni u jednu sekciju. Hobi joj je crtanje, a u slobodno vrijeme gleda i TV. Rado pomaže drugima, ali u radu se najviše oslanja na sebe. Planovi za budućnost su joj dalje školovanje i uspjeh u tome. Melisina poruka generacijama koje dolaze je: "Znanje je veliko blago koje čovjek može posjedovati, a samo učenjem možemo postati neko i nešto, a da pri tome ne zavisimo od drugih, jer ćemo učenjem postići sve to i mnogo više od onih koji nauku nisu shvatili ozbiljno!"

MALKIĆ ADIL VIII-B

Adil, kao najuzorniji učenik VIII-B, omiljen je u društvu, a posebno je drag djevojčicama. On ne uči mnogo, a ipak postiže željene rezultate. Pored redovne nastave, ide na dodatnu nastavu iz matematike, jer mu je to omiljeni predmet. Adil nam to nije otkrio, ali od nekih učenika smo saznale da mu je jedan od hobija pecanje. Zadatke rješava sam bez pomoći drugih. Izrazio je želju da bude doktor, što se nadamo da će i uspjeti. I, na kraju njegova poruka: "Trudite se da postignete što bolje rezultate!"

OSMIĆ MENSUR VIII-C

Uzor učenicima VIII-C je Mensur. Rođen je 10.11. 1990. godine. Dnevno uči vrlo malo, a najviše voli hemiju. Uključen je u sekciju informatike. U slobodno vrijeme voli da ra-

zmišlja i sluša muziku. Voli sport, i kao većina dječaka, najviše fudbal. Planovi su mu da završi srednju školu i fakultet. Vjeruje u sebe i želi da upiše medicinsku školu. Njegova poruka učenicima: "Šalite se i smijite, ali neka vam na prvom mjestu budu školske obaveze!"

EJUBOVIĆ JASNA VII-A

Jasna je jedna od najuzornijih učenika svog razreda. Rođena je 30.03. 1991. godine. Ona provodi mnogo vremena u učenju i pretežno dosta shvati. Najviše voli matematiku i engleski, jer su to jako zanimljivi predmeti. U slobodno vrijeme sluša muziku. Kada je neko zamoli za pomoć, rado pomogne, ako može i zna. Jasna kaže da nije teško biti odličan učenik, samo treba malo volje i truda. Želja joj je da završi srednju školu kao i fakultet. Njen moto je: "Budite ono što jeste i trudite se da postignete što bolje rezultate!"

KASUMOVIĆ MERIMA VII-B

Merima, kao najuzornija učenica VII-B provodi mnogo vremena u učenju. Ona je rođena 28.06.1991.g. Omiljeni predmet joj je matematika pa zato i ide na dodatnu nastavu iz matematike, kao i na časove hora. Svoje slobodno vrijeme provodi uz muziku i TV. Merima pomaže drugima koliko god može. Takođe se bavi i sportom, a najviše voli odbojku. Nakon osnovne škole želi upisati gimnaziju. Njena poruka: "Stvarajte svoju budućnost, učite!"

VUKOVIĆ MUHAMED VI-A

On je najbolji učenik svog razreda. Muhamed se rodio 17.12.1992.g.

ŠTREBERI

Hobi mu je, naravno, fudbal, a u društvu je prava "pričalica". Ide na časove hora, a takođe voli i dramu. Rado pomaže svojim drugovima koji mu to na lijep način uzvraćaju. U budućnosti želi da bude uspješan doktor. Njegova poruka mladima: "Učite i budite ustrajani u onome što želite. Mislite na svoju budućnost, odlučno recite drogi "ne"!"

POLJIĆ JASMINA VI-B

Naša mala Jasmina je jedna od najboljih učenika šestih razreda. Vrlo je pristojna djevojčica, najviše voli matematiku. Voli čitati i gledati TV. Svojim prijateljima uvijek pomaže pa zato i oni njoj pomognu. Želi upisati gimnaziju, a za dalje nije sigurna. Jasminina poruka za sve učenike



UČENIK GENERACIJE KARIĆ SELMA

Naša draga Selma bila je veoma dobra učenica u osnovnoj školi. Rođena je 02.09.1989.g. Kaže da uz malo više truda i upornosti njoj nije bilo tako teško postići odličan uspjeh. Svoja mišljenja je uvijek dijelila sa drugima ali nije nešto posebno pričljiva. Svojim prijateljima je uvijek rado pomagala. Bila je uključena u matematičku, odbojkašku i mnoge druge sekcije. Upisala je matematičku gimnaziju u Tuzli. To što je bila učenik generacije pomoglo joj je da upiše željenu školu bez problema. Zbog toga Selma svim budućim generacijama poručuje: "Učite, istrajite u svom radu, jer samo radom i upornošću sve je lahko postići!"

glasi: "Vjerujte u sebe i budite uporni u onome što želite!"

KARIĆ AMELAV-A

Amela je najuzornija učenica svog razreda, a rođena je 18.06.1994. g. Pomalo je stidljiva i u društvu inače šuti, ne izlaže svoje mišljenje. U slobodno vrijeme sluša muziku i igra se sa svojim drugaricama. Omiljeni predmet joj je matematika a ide i na dodatnu nastavu iz matematike. Takođe je član biološke, kao i odbojkaške sekcije. Ona želi biti nastavnica. Amelina poruka mladima: "Učite i samo učite!"

KASUMOVIĆ HALIMA V-B

Ona je veoma uzorna učenica, jedna od najuzornijih u razredu. Mala Halima je rođena 26.06.1993. godine.

Omiljeni predmet joj je Bosanski jezik. Uključena je u saobraćajnu sekciju a takođe je i prava mala matematičarka. Čita knjige, bavi se sportom i uz sve to postiže odličan uspjeh. Iako je još uvijek mlada, već je isplanirala svoju budućnost. Želi završiti osnovnu i srednju školu sa odličnim uspjehom, da bi kasnije mogla upisati željeni fakultet. Halima je djevojčica koja vjeruje u sebe i često kaže da "sve što hoćeš, to i možeš"!

Kasumović Merina



Duković Muhamed



Poljić Jasmina




Karić Amela




Kasumović Halima





Muniba Ćerimović, VII-B



Muamer Hasić, VI-A



Almedina Imširović, VII-A

Ljubav

Ljubav je slatka,
ko pečena patka.
Ljubav je moja,
ljubav je tvoja,
slađa od meda,
dok se kradom gleda.

Halima Mujagić V-B

Moja škola

Svako jutro moj sat zvoni,
Budi me i zove u školski dan novi.

U svakom mjestu postoji škola,
a moja je kao iz snova.

Zimi kad snijeg pokaže zube,
Domar se brine da toplo bude.

Naša je škola košnica mala
Sa puno znanja i priznanja

Zbog svega toga, čuvajte školu
jer mi imamo, vjerujte, najbolju.

Midheta Omić i
Amina Beganović IV-A

Moja škola


Škola je moja
puna slova.
Graditelj sreće,
zaštitnik od bola

Za nju svako dobro zna,
a najbolje je poznajem ja


Njeno ime svuda zbori,
svud odjekuje,
i svud hori !

Elma Murgić IV-A

Ajdin Zukić, V-B



BEHAR



Alma Muminović, VI-A

Škola

Škola, škola, škola
To je druga kuća moja.

U školi se uči, radi
obrazuju i odgajaju mladi.

Učiti, učiti i samo učiti
Kad odrasteš nećeš se mučiti.

Učitelji, nastavnici za nas se
bore
Da nam sutra bude bolje.

Salmir Čivić IV-A




Samra Bušatlić IV-A

Moja mama

Moja mama je meni najdraža,
Uvijek me čuva kao neka straža.
Kada me ona u školu isprati,
Veselo joj mahnem jer jedna je mati.
Pere, kuha, čisti, i na poslu radi,
A moja je petica lijepo iznenadi

Svako ima majku, neka tako treba
A ja svoju volim odavde od neba.
Od rane zore pa dok padne tama,
Ti si mi u mislima moja draga mama

Lejla Mehmedović II-B



Jasmina Vuković, VII-c

Najdraži poklon

Moj najdraži poklon za rođendan dobila sam od svog oca. To je bio mali šareni, najslađi na svijetu psić. Zbog velikog broja prekrasnih šara dala sam mu ime Šargo. Njegovo umiljato lajanje bi me svako jutro budilo. Svoje slobodno vrijeme trošila sam igrajući se i hraneći najljepšeg psa na svijetu. Šargo je bio moj vjerni čuvar i lijek protiv svih problema. Postao je veliki prijatelj i ostale djece. Kažu da svemu lijepom dođe kraj... Jedno jutro probudila sam se a da nisam čula Šargin lavež. Ta iznenadna tišina me zabrinjavala. Istrčala sam napolje do Šargine kolibe. Ali ,jao, njega nije bilo. Komšija mi reče da je Šargu ukrao neki nepoznat dječak i da mu je pobjegao. Zauvijek sam izgubila Šargu. Plakala sam cijeli dan, i sada plačem.

Alma Okanović V-B




TALENTI

Riječ talenat, najkraće rečeno bi značio, sposobnost koja osigurava visoko postignuće u specifičnim područjima (umjetničkom, sportskom, socijalnom).


Ovom prilikom mjesto u ovoj rubrici dajemo Sarajčiću Edinu našem bivšem učeniku, čije slike i mnogobrojni crteži još uvijek krase unutrašnji prostor naše škole.



Edin Sarajčić



STRANA 10



BEHAR



OŠ POLJICE

VRIJEDNI POŠTOVANJA



UČITELJICA LJUBICA

Kao što i njeno ime kaže, učiteljica Ljubica Aganović, dugo je vremena širila ovim prostorima "opojni miris" znanja našim najmilijim mališanima. Uzoran i predan radnik koji naredne godine odlazi u penziju. Naravno njeni učenici kao i kolege uvijek će je rado spominjati. Učenici naše redakcije školskog lista "Behar" su obavili razgovor sa njom i saznali sledeće. Rođena je 24. novembra 1946. godine u Ubu. Osnovnu i srednju školu završila je u Ubu, a Pedagošku akademiju u Osijeku. U Osnovnoj školi "Poljice" radi 39 godina. Istaknula je da voli rukomet i vježbe na spravama, jer je to opušta i osjeća se bolje. Obzirom da uskoro odlazi u penziju pomalo je tužna i žao joj je što napušta našu školu. Izvela je mnoge generacije za koje kaže da su bile jako dobre, jer su sva djeca dobra. I za kraj jedna poruka od naše vrijedne učiteljice: *"Učite i samo učite, jer znanje je vrednije od svakog imanja. I još nesto, zaboravimo teške riječi mržnje i rata, u miru otvorimo sve prozore i vrata."*



NASTAVNIK FUAD

Naš dragi nastavnik Fuad Hasanović je rođen 12. februara 1941. godine u Lukavcu. Osnovnu školu je završio u Lukavcu, a srednju školu i Pedagošku akademiju u Tuzli. U Osnovnoj školi "Poljice" radi već 9 godina. Generaciju naše škole koju smatra najuspješnijom su učenici koji su završili školu 2001/2002. godine. Svoju ljubav prema sportu i djeci svakodnevno pokazuje svojom dobrodošlicom za svakog učenika koji ima problema. Njegovo radno vrijeme traje 24 sata svakog radnog dana, ali i subotu i nedjelju najviše provodi u društvu učenika. Osim nastave tjelesnog i likovnog nastavnik Fuad pomaže u odgajanju i pripremanju svih nas za budućnost, trudeći se da nam pomogne u potrazi pravog puta i najljepših najvažnijih životnih ciljeva. Uči nas kako da uživamo u životu ali i kako što bolje da ga provedemo. Mnogo mu je žao što odlazi u penziju. Kada bi se ponovo rodio opet bi bio nastavnik. Njegova poruka mladim je: *"U životu se sve postiže radom, i samo radom. Talenat je samo 1 %."*



AJANOVIĆ HATIDŽA DŽIDŽA

Čistoća je pola zdravlja. Za pola našeg zdravlja dugo godina se brine naša draga teta Džidža. Džidža je rođena 19. februara 1945. godine, a u školi "Poljice" radi 29 godina. Susretala se sa mnoštvom generacija pa je doživjela više lijepih nego ružnih trenutaka. U zasluženu penziju ponijeeće lijepe uspomene na djecu i kolege koji su je uvijek cijenili i poštovali njenu predanost poslu. Želimo joj da mnogo penzija potroši u zdravlju i rahatluku a mladim poručuje: *"Budite pedantniji, pametniji i poštujujte starije."*



UČITELJ EDHEM

Učitelj koji je cijelog života bio to i nimalo ne žali zbog toga, jeste naš učitelj Edhem Rahmanović. Rođen u Seoni 01. oktobra 1945. godine, završio osnovnu školu u rodnom mjestu, Učiteljsku školu u Tuzli i Pedagošku akademiju u Osijeku. Već 33 godine živi i radi u našem mjestu, a ove godine se sprema u zasluženu penziju. Sa nostalgijom se sjeća svojih učenika, ali i sa ponosom ističe njihove uspjehe. Naročito pamti po odličnom uspjehu i vladanju svog bivšeg učenika Poljić Mirsada (danas inženjera elektrotehnike) koji i danas ima kontakt sa svojim učiteljem preko rada u Upravnom odboru škole. Naravno našeg Uču će dugo pamtititi generacije njegovih učenika kao i radne kolege po njegovoj sposobnosti i predanosti poslu. Njegova poruka za nas mlade je: *"Učiti i samo učiti, a što je najvažnije - slušati roditelje."*

LJETNA ŠKOLA ZA ROME

U periodu od 1.jula do 15.avgusta 2004.god. a u organizaciji UG «Zaemlja djece» i «Save the Children» iz Tuzle, organizirana je Ljetna škola za djecu Rome u prostorjama OŠ «Poljice» u Poljicu. Obavještenjima i polijepljenim letcima, pozvana su i ostala djeca školskog uzrasta da se pridruže ljetnim događajima u školi. Nastava se održavala dva puta sedmično u trajanju od po tri časa dnevno.

Radu Ljetne škole predhodile su opsežne i detaljne pripreme. Sačinjen je plan, program i raspored rada. U rad je uključeno 9 studentica, apsolvantica filozofskog i defektološkog fakulteta. Sadržaj rada iz bosanskog jezika i matematike uzet je iz važećeg Nastavnog plana i programa za osnovne škole.

Ljetnu školu pohađalo je 27-ero romske djece iz Svatovca, 2 učenice iz II razreda I 2 djevojčice predškolskog uzrasta iz Poljica. Na završetku Ljetne škole, organizirana je đaćka priredba u kojoj su učestvovali svi polaznici. Tom prilikom djeci su podijeljene diplome za učešće u radu Ljetne škole.

Intervju sa predsjednicom Ljetne škole za rome gospođom Zoricom Koncul obavila Erna Nukić (VIII a)



VIJEĆE UČENIKA

Prvi sastanak Vijeća učenika, školske 2004/2005 godine, održan je 20.10.2004 g. Na sastanku je izabrano predsjedništvo i usvojen Godišnji plan rada za tekuću godinu. Predsjedavajući Savjeta je Erna Čatić (VIIIc), a podpresjenici su Adil Malkić (VIIIb) i Melisa Žabić (VIIIa). U razgovoru sa Ernom Čatić doznali smo da je osnovni cilj organizovanja učenika poboljšanje uslova rada i života učenika, kao i zadovoljenje osnovnih učeničkih potreba.

Pripremio: Muamer Nukić (VIIb)

PRVI RAZRED DEVETOGODIŠNJEG ŠKOLSKOG SISTEMA

U razgovoru sa prvim učieljom prvog šestogodišnjeg razreda saznali smo, sledeće. Školske 2004/2005 godine u našoj školi upisano je jedno odjeljenje za prvi razred devetogodišnjeg školovanja. Prvi razred čini 22 učenika i to 9 dječaka i 13 djevojčica. Učenici dnevno imaju tri časa. Raspored časova nemaju, zato što su časovi fleksibilni (po mjeri učenika). Osnovna potreba djeteta je da se osjeća voljenim, prihvaćenim i sigurnim, kao i potreba da se igra, da ima adekvatnu rekreaciju, da zadovoljava interese, da uživa u spontanom smijehu, veselju i humoru. Na osnovu ovih potreba učeničke aktivnosti u školi usmjerene su na učenje kroz igru. Učionica je postala i radionica i stvaranica i igraonica. Novina ovog školovanja je i opisno ocjenjivanje. Opisna ocjena je povratna informacija roditelju o djetetu. Ocjene 5,4,3,2,1 zamijenjene su smješkom i ljutkom, zatim super, bravo, odlično, nije loše, možeš i bolje itd. Za realizaciju svih programa potreban je adekvatno opremljen i uređen prostor. Naša "soba"

djeluje lijepo, primamljivo, vedro, što su nam potvrdili roditelji, nastavnici i ostali stariji učenici. Osnovni cilj ovog školovanja je da školu približimo djetetu, a ne dijete školi, koliko ćemo u tome uspjeti ostaje vremenu da presudi.



ROMI U OŠ POLJICE



TAHIROVIĆ ADNAN VIB

Adnan je rođen 11.11.1991 godine u Poljicu. Sa petočlanom porodicom živi u Romskom naselju "Svatovac" kod Poljica. Njegov omiljeni predmet je matematika a nastavnik Brkić Omer. Kada poraste i završi srednju školu želi postati auto-mehanicar. Ako nekom njegovom drugu zatreba pomoć

uvijek je tu. Voli narodnu muziku, najviše zbog Ljube Aličića i njegove pjesme "CIGANIN SAM AL NAJLJEPŠI" U slobodno vrijeme voli da čita avanturističke knjige i da se igra sa društvom. Svojim vršnjacima poručuje: "Školom ćemo postići ono što želimo, a lutanjem izgubiti dragocjeno vrijeme..." i još dodaje, da je za njega "vrijeme novac!"



NASTAVNIK OMER BRKIĆ U RAZGOVORU SA RODITELJIMA NA UOBIČAJENU TEMU "ZAŠTO DJECA NE IDU U ŠKOLU"

FOTOGRAFIJE SA ŠKOLSKE IZLOŽBE NA TEMU "ŽIVOT ROMA U NASELJU SVATOVAC"



AUTOR: Adil Matkić VIIIb, MENTOR: Admir Osmanović, pedagog


NAJ ČITALAC



U Osnovnoj školi "Poljice" ima dosta aktivnih čitalaca lektira i ljubitelja pisane riječi. Ovom prilikom smo odabrali učenicu Čatić Azru (VIIIb) kao "najčitaoca", koja je do sada pročitala "stotinjak" knjiga i lektira. Za učenicu Čatić Azru "knjiga je više od knjige", čovjekov najbolji drug, i zvor zadovoljstva i sreće. Na pitanje koja je joj najdraža knjiga, ona je odgovorila da je to više knjiga kao npr. KAKO SE KALIO ČELIK i DERVIŠ I SMRT.

JA I MOJ PROBLEM

Na temu esej-testa: „Ja i moj problem“ učenici šestih razreda pisali su mnoge probleme koje doživljavaju na svom uzrasnom nivou. Analizom eseja došlo se do sljedećih podataka koje izražavamo u procentima.



Testiranje obavljeno nad 63 učenika VIa i VIb, školske 2003/2004. godine, od strane pedagoga škole.

STARI POLJIČANI



Sultanić Osman zvani Pljoko rođen je u februaru 1913. godine kao jedino dijete oca Alije i majke Fatime. Veoma rano je

ostao bez oca i kako nam reče djetinjstvo mu je bilo vema tešk. Oženio se 1932. godine Imširović Mejrom s kojom je imao devetoro djece. Svoju porodicu je ishranjivao radeći teške poslove: kopanje, košenje, a kad je stekao konja život mu je krenuo na

bolje. Imao je Osman jedno vrijeme i pekara a 15 godina je držao bosansku kafanu u kojoj nije bilo alkohola.

Ponosno spominje da danas ima 27 unučadi, 26 praunučadi i jedno unučće od praunučeta.

BEHAR: Koje ste ratove preživjeli? Živio sam u staroj Kraljevini Jugoslaviji. Za vrijeme drugog svjetskog rata zarobljen sam u Srbiji. Bio sam u logoru u Njemačkoj. Po povratku iz logora ponovo sam pozvan u Hrvatsku vojsku, a onda u Njemačku vojsku gdje sam bio do kraja rata, do 1945. godine.

BEHAR: Kako Vam se čini današnji život u odnosu na život dok ste Vi bili mladi?

Današnji život je 100 puta bolji od prijašnjeg. Prije se teže živjelo i bilo se siromašnije. I danas loše živi onaj ko nije zaposlen.

BEHAR: Ima li nešto za čime žalite, što ste željeli uraditi a niste?

Ne žalim ni za čim. Moja najveća životna želja je bila da obavim hadž. Ta želja mi se ispunila 1974. godine, kada sam i postao hadžijom. Ovom prilikom poručujem mladima da vjeruju u Boga, da ne troše alkohol i drogu.

1. Koji je najveći ocean na svijetu?

- a. Indijski ocean
- b. Tih ocean
- c. Atlanski ocean



REZULTATI



DO 10 BODOVA:

Trebali bi ste malo više vremena provesti čitajući kako bi poboljšali svoje znanje.

OD 10 DO 25 BODOVA:

Nije loše. Još malo čitanja enciklopedija i bit će OK.

OD 25 DO 30 BODOVA:

Odlično. Već ste dostigli visok stepen znanja i možete biti zadovoljni.

2. Ko je predstavljao BiH na EUROSONGU "2004"?

- a. Mia Martina Barbarić
- b. Fuad Backović Deen
- c. Dino Merlin



4. Osmislite što dužu riječ od sledećih slova

1. R/T/E/NJ/J/S/I/F/G/M/P/Z/
2. R/N/U/D/S/U/O/Z/E/P/N/T/



Svaki tačan odgovor na pitanja 1-3 nosi 3 boda. Svako slovo u dobijenoj riječi u zadatku pod 4. nosi po 1 bod.

Maksimalni broj bodova: 30

PRIPREMILI:

- IMŠIROVIĆ ALMEDIN VIIIa
- KASUMOVIĆ VEDAD VIIb
- MURSELOVIĆ ENIDA VIIIa

3. Najnovije Bosansko-hercegovačko ostvarenje filma je...

- a. Kod amidže Ismeta
- b. Kod amidže Šabana
- c. Kod amidže Idriza



DA LI STE ZNALI?

☉ ➤ Da se Kolibri često ne kreće istopio bi se, jer njegova tjelesna temperatura iznosi do 400c.

☉ ➤ Da jedna vrsta Kolibrija tokom noći prelazi u stanje polumrtvih. Da to ne čini umro bi od gladi ili bi se smrznuo.

☉ ➤ Da Koala provede tri četvrtine svog života spavajući.

☉ ➤ Da najveći raspon krila ima Albatros, a ona su široka 4m.

☉ ➤ Da je najmanji majmun Marmuzet - teži 14g.

☉ ➤ Da u pustinji Goli ima 3% pijeska.

☉ ➤ Da je najbrža životinja Gepard i razvija brzinu do 110km/h, lako se pripitomljavaju i nije vješt penjač kao ostale mačke, jer mu se kandže istupe tokom brzog trčanja.

☉ ➤ Dali ste znali da je Delfin jedina životinja koja ne spava cio svoj život.

PRIPREMILLO: Adin Omić, Nermin Kasumović



VICEVI



RIBLJE ULJE

- Učiteljica pita đaka: Piješ li riblje ulje?
- Svakog dana.
 - A ko ti ga daje?
 - Mama... Mada više volim da mi ga daje baba.
 - Zašto ona?
 - Zato što joj se tresu ruke,



ĐAK

- Žena prolazila ulicom i kroz prozor ugledala malog đaka kakovrijedno uči.
- Učiš kao pravi mali čovjek. Mora da ti je mama nešto obećala, ako sve dobro naučiš.
 - Ne učim ja zbog toga.
 - Nego zbog čega?
 - Tata mi je obećao nešto drugo, ako ne naučim sve što je zadato.



2 KRUGA

- Bježi čovjek od psa, trčeći oko bunara. Naiđe drugi i reče:
- Pazi uješće te pas!
 - Neće, bježim mu već dva kruga.

PRIPREMILI: Admir Aganović, Samed Podanović



PORUKA ZA RODITELJE

Podsjetimo se da djeca uče od nas i na iskustvima vlastitog života:

Ako djeca žive uz stalnu kritiku
ona će naučiti da osuđuju;

Ako djeca žive uz neprijateljstvo,
ona će naučiti da budu svadljiva;

Ako djeca žive uz poniženje,
ona će naučiti da budu stidljiva;

Ako djeca žive uz postidivanje,
ona će naučiti da se osjećaju krivim;

Ako djeca žive u toleranciji,
ona će naučiti da budu tolerantna;

Ako djeca žive uz podsticanje,
ona će naučiti da budu pouzdana;

Ako djeca žive uz pohvale,
ona će naučiti da odaju priznanje;

Ako djeca žive u jednakosti,
ona će se naučiti pravednosti;

Ako djeca žive u sigurnosti,
ona će se naučiti povjerenju;

Ako djeca žive uz cijenjenje,
ona će se naučiti samopoštovanju;

Ako djeca žive uz prihvatanje i prijateljstvo,
ona će naučiti da nađu ljubav u svijetu.

(Iz FILIUM-a, Argentina)

PRIPREMILI:

ERVIN BEGANOVIĆ VIIIc
JASMIN BEGANOVIĆ VIIIc

(CRTEŽ: SULJIĆ SELMIR VIb)